



Urkunden-Sammlung zur Geschichte der auswärtigen Verhältnisse der Mark Brandenburg und ihrer Regenten

...

namentlich in Beziehung auf Anhalt, Bayern, Böhmen, ... und andere
Länder ; [Urkunden-Sammlung für die Geschichte der auswärtigen
Verhältnisse]

Riedel, Adolph Friedrich

Berlin, 1858

2478. Des Kurfürsten Joachim Vollmacht zur Empfangnahme der
Böhmischen Belehnung, vom 15. Februar 1518.

Nutzungsbedingungen

[urn:nbn:de:hbz:466:1-56621](https://nbn-resolving.org/urn:nbn:de:hbz:466:1-56621)

2478. Des Kurfürsten Joachim Vollmacht zur Empfangnahme der Böhmiſchen Belehnung,
vom 15. Februar 1518.

Wyr Joachim, vonn gottes gnaden Marggraue zu Brandenburg, des heiligen Romiſchen Reichs Ertzcamerer vnd kurfürſt, zu Stettin, pomern, der Caſſuben vnd wenden herzoge, Burggraue zu Nornberg vnd fürſt zu Rugen, Bekennen vnd thun kunth offentlich mit dieſem brieffe vor allermeniglich, die jn ſehen, horen oder leſen, das wir gegenwertige N. N. etc., als vnſere lehntragere ſamptlich vnd ſunderlich aufgefertigt vnd jnen wiſſentlich zu empfangung vnſer lehen vnd lehenschaſſten, Mit namen die herſchafft Cotbus, Slos vnd Stat, peytz, Tuptzk, Bernwald, den hoff groſſen lobben vnd die herſchafft Czoffen, Slos vnd Stat, mit gantzen vnd aller jrer zu vnd eingehorungen, herligkeiten vnd gerechtigkeiten, nichts aufgenohmen, jnmallen vnſer loblich eltern vnd vorfaren etwan dieſelben zu jren lieben vnd wir itzund gedacht herſchafft zoffen erblich vnd auf geſcheen entlichen vertrag vnd verlaſſung des wolgebornen vnd Edlen, Eren Laſſlowen von Sternberg, hern auff pechinn, des konigreichs Behem oberſten Cantzlers, der Erbschaſſten, ſo jm konigliche wurde zu hungern vnd Behem daran gegeben, zu vns gebracht von der kron zu Behem etc., die alle zu ſuchen, zu bitten vnd lehenspflicht zu thun In der aller peſten weiſs, form vnd maſs, ſo das ymer beſtendigſt ſein vnd geſcheen mag vnd kan, vnſer volkomen macht vnd gewalt gegeben haben, vnd geben jnen ſamptlich vnd ſunderlich ſollich vnſer macht vnd gewalt, wie obſtet, jn crafft vnd macht ditzs briffs vnd also, das ſie anſtat vnd von vnſernt wegen als vnſer lehntrager von der gemelten Cron zu Behem vnd die des beuelich vnd gewalt haben, alle obbeſtimpte lehen vnd lehenschaſſten der herſchafft Cotbus, Slos vnd Stat, peitz, Tuptzk, Bernwald, den hoff groſſen lobben vnd zoffen, Slos vnd Stat, mit gantzen vnd allen jren herlicheiten, zugehoringen vnd gerechtigkeiten, nichts hindan geſetzt, Suchen, Bitten, empfangen, lehenspflicht nach laut der lehn brieff vnd altem herkomen vnd eyde jn vnſer ſele ſchweren vnd alles das thun, auch lehn brieff nemen, wie ſich allenthalben nach gewonheit vnd vbung von ſollicher lehn wegen furzunehmen eigent vnd geburt, vnd was auch gedachte vnſere Rethen vnd lehntragere N. N. etc. hirin dermaſſen, Suchen, Bitten, Sweren, verpflichten, empfangen vnd geben, das ſoll vnſer gantzer will vnd geheyſs ſein vnd pleiben, wollen dem auch vollkommenlich vnd vnuerbrochenlichen nachkomen jn allermaſs, als hetten wir das eigener perſon geſucht, gehandelt vnd empfangen. Ob auch vnſern Rethen vnd geſchickten einichs weiterren vnd beſtendigern gewalts nott were oder ſein mocht, den wollen wir jnen hiemit auch gegeben haben, alles getrewlich, ſunder argeliſt vnd one generde. Zu urkunt mit vnſerm anhangenden jungelgel verſigelt vnd Geben zu kolen an der Sprew, am montag nach Eſtomichi, jm funfzehnhunderſten vnd achzehendeſten jare.